

項城縣志卷二十四

人物志三

方正

明

王心熙字惺止賦姿溫茂留心古處讀書必三代以上為文力追秦漢嘗曰文以載道非徒博一第為榮也食餽後會明末盜賊蜂起所在屠掠因慨然發貲募丁壯繕寨垣一方賴之國朝定鼎絕意功名惟問耕課讀檢方施藥暇則與二三知己杯酒論文而已

據王氏譜補

鄧清字澄一庠生父贊炎廩生當明季之亂義行卓著擅一鄉善士之譽清承庭訓家法益嚴子弟禁衣絲無故輕出門者責不貸子孟樞字文木補農官力行善事涂明府璋以積德上聞題

其門族鄧氏
譜補

國朝

閻陞字晉之號會竹賦性醇謹昶躬和平讀書手不釋卷雅有高
致補博士弟子員屢擢高等食廩饒邑侯薛器重之顧曰鴻才
八斗鄉試薦元二次未售遂絕意科名惟扁戶課子為樂子萬鍾
以順治丁亥選拔令城固陞以政在清心教之尋以歲貢除鞏
邑司訓抵任會先一日訓導裁缺邑令勸其到任陞不許遂紆
道赴子任焉

馬第元字首擢庠生性孝友詩禮傳家齒德為一方冠康熙三十
六年與鄉飲介賓邑侯陳五典以文行可矜獎之孫紹軾字述
瞻亦庠生克繼先緒學行為鄉邦所推重雍正十二年奉

旨設立直月宣揚

聖諭紹軾任其事人皆欽之總督部院

額其門曰敬敷五教

石凝禧字鴻錫通判邦楫孫也性敏惠和氣迎人孝敬友恭德行靡弗欽仰讀書專精早食廩餼貢成均東鐸確山裁成多士未幾卒於官子二長茂枝次薰枝俱成立能世其家

麻坦字平子性嚴重寡言笑家徒四壁雖一介不輕取與工鍾王草書素嗜酒醉則潑墨淋漓筆無擇紙至今獲其隻字者悉寶之其所教生徒皆一時偉器皓首窮經以歲薦終

閻灝字體仙庠生性慷慨好義個儻不羣遇有不平事則聲色俱厲有酷吏虐民力白上憲褫其官處鄉黨宗族雖犯不校遇貧不能婚葬者輒助之

據閻氏譜補

王壯國字侍朝廩生淡泊寡營不親世務一生惟愛讀書雖溽暑嚴寒未嘗釋卷所著制藝稿曰俚言集理法兼備一時習舉業

者宗之教子轍成進士自有傳

據王氏譜稿補

金純字還樸父楷名諸生行誼為鄉里推重純才頗鈍性耐苦讀兩兄皆才高能文竟不售純弱冠入庠旋食餼中年貢成均不求仕進惟以讀書養志裁成後進為汲汲壽八十餘所著詩文集若干卷兵燹後無一存者

補

高應昌字介庵庠生性孝友博文篤行士習宗之聲望孚鄉里邑侯劉其時引為鄉飲介賓旌曰德邵文優雍正四年巡撫田文鏡表其閭曰鄉里推重生平芳躅眾口交稱卒年八十五

王撫官字希周性剛正矜名節敦氣誼難進易退義利之界終身守之如一日幼聘張氏病瘥張父命改聘撫官堅執不允于歸後事事賴人扶持無憎嫌意百方調治數年竟愈以艱於嗣納妾龔氏撫官早年踴厲風發膺雍正己酉鄉薦屢上公車不第

俯就廣文司鐸永城重行誼勤課試有恃才干犯名教者誠諭之有倚勢武斷鄉曲者懲治之有貧窮膏伙不能自給者捐俸金資助之士行日勵文風丕振初入京與邑人樊執中訂莫逆交受會同館大使商邱趙公聘招樊與偕以候監試入館三日樊罹時疫卧牀褥羣懼傳染莫敢近撫官朝夕侍湯藥不離左右歷二十餘日弗倦後樊小愈又念其父年已望七聞子染病千里外恐難為情立卻館金偕樊南旋風雨保護兩月餘始抵家及赴都候選時夏邑方伯彭公被讒賜帛鄉里莫敢弔撫官獨毅然往哭之且戟手午門斥讒奸不絕口時族姪仲以武解元候試於京聞之竊負以逃蓋彭公之死通國冤之得撫官之哭詈而人心稍慰巡捕者莫之急故免於難任永城學四載以病致仕未逾年卒貧無以為斂

據王氏譜補

李春芳字蘭若父理縣試冠軍未及院試沒母姚氏貞節自勵教子有方春芳仰承母訓勵志讀書甫弱冠補博士弟子員潛心濂洛之學居平言動不苟教人以小學為宗治家篤恩誼嚴內外閨門之內肅若朝廷卒年八十七長子萬程績學未遇孫玉書洛書皆名諸生六世孫華堂歲貢生留心正學治家一遵先

型據李氏譜補

王宏霸字玉虹生而敏悟年十四入邑庠旋食餽強仕貢太學任汜水教諭教士有法生徒日親生平事蹟有成皋王二酉為之傳補

韓模字頤公聰敏詳慎謙沖宜人幼時兄桓教之妙有會悟弱冠食餽雖屢困棘闈坦然無跼蹐態胸襟渾融人所莫及乾隆辛酉貢明經未及見用而卒時論惜之以上舊志

袁九芝字瑞莖別號湘浦溫恭孝友處鄰里謙和忍讓雖以非禮犯之不校也其厚德至今里黨猶稱道之拓田三頃餘子四長利振次耀先耀南字麗中端厚有父風耀東字海門庠生端敏公甲三父也兩世皆以端敏貴

贈光祿大夫兼振威將軍

王宗度字聖儀生而岐嶷甫入塾莊誦不隨羣兒戲稍長益肆力於經史諸大家文旋以第一人補博士弟子員每試冠軍餽於庠甲子鄉試薦而未售以恩貢成均尤篤嗜聖賢之學於性理近思錄諸書身體力行性甘澹泊不慕榮利優游林泉終其身子翼經號芥亭幼聰敏讀書日數行下弱冠餽於庠乾隆丁卯列鄉薦事親色養備至居喪哀毀踰禮服闋抵選派委管理浙江長林鹽務不事征求且改熬為曬忤鹽道幾獲罪旋改教職秉鐸商城極力提倡正學任滿考職方伯俾監商城倉穀事

知放牧之弊痛絕之不名一錢旋以親老辭歸修族譜開街市
置集宅出租充公迄今義塾脩金膏火之資仍賴焉建文昌閣
修萬濟橋置義冢賑困乏尤嘖嘖人口

馬廣訓字振鐸天資穎悟初操觚為文即驚其老宿弱冠列膠庠
補增廣生抱負磊落內行純備遇事慷慨不為世俗迂儒態排
難解紛鄉鄰共稱子棲梧字鳳儀有父風英年文名噪士林年
踰古稀始入庠嘉慶庚午中副車

田方穀字敬敷乾隆丁卯科與弟方茂同榜舉人司鐸陽武甫下
車有弟生毛玉成霸佔鄰田三十餘畝被害五十餘家邑宰置
不問方穀直稟上憲欲置毛於法毛富甲一邑賄上官左袒之
事終得白毛自是斂迹方穀亦解組歸弟方茂字北里號蝸廬
重信義矜名節烈婦鄒氏入志烈女山姑請旌皆力主其事選

授廣東連山知縣因親老改河內縣教諭廉靜寡欲勤學樂育
從遊者甚衆六年之內登賢書捷南宮者五人尋以疾卒於官
魯為宗字秉周以諸生貢成均選教職平居以道義自持慎交遊
毀譽不輕出口自奉甚約與人則從厚處衆和教子嚴裁成及
門皆循循雅飭嘗修族譜立家規十二條可法可則門人樊執
中序之天性篤厚胞兄思孔早歿嫂龔氏孤寡無依厚待之為
請旌表嘗囑子孫曰吾祖塋南偏有孤墳乃吾師王子佩先
生之墓卒無所歸祭掃皆吾責也歲饑告糴盈門斗量從豐且
不假僕人手曰此先人遺教也論者謂為篤行君子

靳泰臨字時東號魯峯乾隆丁卯舉人揀選江西知縣以性情剛
方守正不阿與當道不合遂告歸就本省教職歷任西平遂平
固始教諭陞鄧州學正南陽府教授在固始重修文廟剛正無

私士林德之以磊落光明四字樹碑學宮至今稱頌不置詩宗李杜字逼鍾王生平讀書為善外一無所好取與一介必嚴子梓山邑庠生曾孫栗珽道光癸卯舉人主講嵩陽書院多所造就元孫子純廩貢生學品重一時

勾永譽字芳遠號敬齋性聰敏嗜學如飢渴家極貧無力從師入庠後資硯田為養教諭郭琮愛其才招致之讀書署內飲食教誨造就甚殷永譽果登乾隆己亥鄉薦淡於仕進一以振興斯文為己任從學日衆乃於朱灘店西興國寺建大成殿三楹設聖牌率諸弟子講學其中春秋奠祭以專崇嚮縣主張公石緒素重永譽品學率同寅各捐俸資為營齋房以庇多士風雨晦明絃誦不輟遊庠食餼登鄉榜者不可悉計一方才俊類出其門諄懇講授至老不倦嗣子廷選亦業儒不墜家聲

魯木字東仁生而挺特笑言不苟嗜古學工楷篆有聲庠序家政嚴肅同居六十口無閒言內外親鄰入其門者氣為之斂不營華屋不侈衣冠婚喪盡禮不從流俗延師課讀修繕必豐子姪皆彬彬能世其業

郭成字子誠號象山恩貢生以師道自任學崇根本先行後文砥礪廉隅薰陶德善為一時州閭所宗鄉塾冬多解散成獨與二三子朝夕矻矻嚴寒不輟來學者日益衆齋舍至不能容游庠食餽掇巍科者指不勝屈袁端敏公甲三商水進士李輔其尤著者也篤於內行事節母袁邑養兼備族黨稱孝家雖貧泊然自得詩書外無他好道光九年卒年六十子三長萬頃次萬選次蘊輝道光丁酉選貢孫七人

竇豹變字文蔚生而穎異行止慤謹弱冠饒於庠時外家樓妖狐

作崇為文祭之遂止丁內外艱哀毀盡禮嘉慶戊辰舉於鄉年五十矣教人以朱子小學為根基不專攻舉子業游泮水登賢書者數十人授禹州學正敦實行戒浮囂多士景從值七旬誕辰及門祝以百韻詩

楊華修字茂先性剛介有氣節數歲入里塾同學某姓子伶籍也恥不與揖塾師奇之孝友性成事親愛惡不違其心弟華春承祧旁門祖業仍與均分白首無閒每得甘旨必招弟共食量甚宏嘗與人同船因小嫌被詈辱坦然不與校比鄰李姓子盜華修器物其父知之雪夜掘地縛其子將埋之華修聞趨救其人卒改行壁有藏金先世所儲也適命佃戶葺屋為竊去置不問嘗誡家人曰人之敗家多由賭訟吾家數世無片紙入公門亦無一人學賭故能保守先業於不墜平日教家甚嚴閉門肅靜

雖幼女不敢輕出內閨子姪有失不稍恕子三長純德次全德承從兄華林嗣年五十餘抱孫往賭所贏百錢歸述呵叱跪請罪乃已明德字釋經號朗軒幼穎敏數歲授讀通大義長因小試而讀書之志不衰事親先意承志始終不違兄性嚴事之惟謹推甘讓美自奉極約性仁厚親戚貧而求濟者已所有慨與之鄉黨或有爭端為剖是非直者德之屈者亦帖服光緒戊寅春大飢家儲餘粟分濟親鄰復領倉穀數十石以救飢民自以讀書未成課二子極嚴竭力延師雖積債不恤也又於村南穎水寺修大成殿祀先聖先賢建講堂聘名師主講其中從學者多自遠而至採芹食餼登鄉薦者指不勝屈更於課文外延耆儒講實學人皆知聖賢可為二子凌霄凌閣因得賢師友鼓勵夾持知自勉於正學晚年篤嗜先儒書擇要鈔錄寒暑不閒有

悟軒劄記曰體驗錄或為二子言之多與古合既歿二子述而記之觀於此者可見其所得矣

楊月桂字清府增貢生司鐸杞縣為諸生講性理之學學者翕然宗之解組後平糶施藥歲饑布種菜子倡修鄭郭集寨善行不可枚舉

袁鳳三字桐友端敏公胞弟早孤與兄勵志讀書英年饒於庠例授禹州訓導齋舍狹隘來學者至不能容乃重修文廟恢拓舊宇值禹境大旱大府檄委查災不遺不濫咸豐間有匪假聯莊會名謀倡亂馳往曉以利害皆感動解散南陽山谷中多悍賊不時出擾禹時城多傾圯人心洶懼州守每出督戰委鳳三處守乃率衆巡城徹夜目不交睫復典衣倡捐粟米以濟貧乏士民感其忠義守益固賊平鳳三謂州守曰天下多事兵未可旦

夕弭也遂率士民修城培隍濬池繕守具修兩郭外石橋以利避亂者入城皆始終其事後晚匪至禹而城屹立獨全鳳三之力也蒙

恩加四品銜在任候選同知不就禹人感之為設長生位送衣繖匾額固辭不得始受歿後士民請入名宦祠子保頤字蔭臣自有傳孫世斌字兼之署廣濟縣知縣

黃錦鳳字文翔雪莊家孫廩生哲義子也天性孝友悃惓無華善書弱冠鎮於庠尋貢明經時值兵燹淡於榮利適兩江總督曾公勦辦李士林劉天駟等匪並援沈邱軍餉支絀耳其名敦請勸捐佐軍辭不獲一月得七萬金保授偃師縣訓導抵任諸生來謁者輒勉以勵品節重道義士風一變偃邑地當衝要往來軍馬駐節丈廟踐踏日甚錦鳳力爭以為不可將兵者心折移軍外住新進諸生不計束脩厚薄甚有不名一錢資其膏伙者

奉文舉節孝不遺不濫一時報四百餘名細加校勘雖盛暑必具衣冠家人勸之答曰烈女節婦皆天地正氣豈可赤身裸體以對神明乎共計冊部川費約二百金遣人歸項鬻己田以濟終不令節孝家知之他如善排解以安反側修城池以資捍衛鑄軍械以固防守定約章以嚴訓練皆其沁入偃師人心脾者也旋以積勞成疾同治元年八月二十六日卒於任所閩邑紳民憐其貧斂貲歸櫬哭送數十里詳請入名宦祠弟起鳳字華章幼沈靜不隨人嬉戲讀書日不過數行成誦即不忘弱冠以府試第一入庠屢試棘闈不第遂棄舉子業博觀羣書書法右軍兼工篆隸與兄錦鳳齊名有得其片紙隻字者皆珍藏之侯香山字友白號芸庵束髮受書不屑屑於章句俗學弱冠餽於庠年二十七登道光癸卯賢書屢上春官不第隱居教授及門

採芹食餽貢明經者十餘人光緒四年授安陽縣教諭歷任三載以扶翼名教振興斯文為己任子二長之翰歲貢生次之芹庠生

余應昇字慶時生而穎異數歲在外家見人讀書輒往聽記誦弗忘及入塾嗜學不倦開筆學文即能成章成童後從任濬川先生學先生邨其貧不受館穀加意訓迪應昇亦刻苦自勵夜卧木甕醒即起讀學大進弱冠入庠試輒冠軍旋食餽屢薦不售貢明經亦不就銓授徒課士先行後文隨材造就有沈邱李氏兄弟不睦委曲勸諭復為詩歌贈之情韻纏綿兄弟讀詩流涕和好如初汝陽申烈婦幼許字同里秦氏子歸秦四日夫故以死殉感其烈為古風一章七律五章以表揚之悽愴惻讀者感動尤篤內行事親出入必告先意承志每自館歸督課兩弟